

四庫全書

集部

欽定四庫全書

景文集卷三十一

宋 宋祁 撰

外制

王堯臣可三司使制

敕經九咳之入以制國用籠萬貨之美以謹邦財平時倚成使領為重汎邊鄙未靖懷調亟興舟楫所輸項背相屬商總明度彌見其艱擇才而任僉言茲允以爾王

堯臣器閎質茂行淑履方比冠承髦寢撫優仕歷階詞
禁俾代予言俾為文章近古風烈向假命節再撫西人
綏慰流庸宣導嘉美已試之效有位具聞宜旌幹蠱之
能往諧主計之劇仍華內署增秩左民朕惟師興之繁
食足為本出納矜吝既付于攸司有無懋遷當視于成
訓圖善而職對我茂恩

國子博士楊文友可尚書虞部員外郎制

敕具官楊文友慶善承家方廉絜矩心通吏治志服官

歲屢闕決于郡條久逶迤于朝紱課成有狀賞協當遷
俾陟朕虞之曹且光郎宿之選

國子博士魏琰可尚書虞部員外郎制

敕具官魏琰夫馭吏之方責實為效殿既成罰善亦當
遷循而行之官則無濫以爾簪裳華緒文牘美才臯輟
朝紳之良克成縣譜之治課目來上歲次亦周宜由經
庠往踐郎位服我榮典無廢舊勞

國子博士向繹可尚書虞部員外郎制

敕具官向繹積慶之餘階蔭而仕綢繆吏閥僊俛朝榮
比倅州符之煩且齋官簿之要課皆應攷歲亦當遷朕
虞之司郎選為重往升華秩無廢舊勞

杜惟序可知滄州制

敕朱閣凝敞便聯尤貴劇選要任庸得實才以爾具官
杜惟序代閥忠規蕃衍沈濟服在近列夙暮告虔河朔
之區繕守完備方事之總擢委价藩悉心振職謀無遺
諝興議歸美達于予聞特推寵章超踐華局弗遷他領

之舊並圖來譽之升露服以行足詫方郡

郝元規可西京左藏庫副使知辰州制

敕郝元規材秀庸敏照機無滯朱閣中殿勤事有年陝
都而西假節將命糾讞詳簡藹于予聞進貳使聯且付
州任矧辰陽之控蠻落在焉綏徠荒梗參責威愛往念
榮寄懋哉不忘

楊告可右諫議大夫知鄭州制

敕諫省華要從古為重比來以位遇既顯言責難專故

寵其器名以宅良畷雖不莅職要為邇臣具官楊告慮敏以精器適而濟嚮煩所使用觀其能而漕引東南輸入都內歲有羨餉役無淹期伙予足食之術時乃析豪之效僉質公議應圖厥勞俾升七諍之列且藩三輔之邇懋率忠力光對寵靈

李知和可西京左藏庫使制

敕李知和性挺柔良志安謹力誠事宮闈夙夜以須服勤扈帶左右逾恪嚮閱功次久待歲成持從優除式示

蕃獎離都豐帑名要地崇欽踐使華仍總餘職

張庚充開封推官制

敕畿輦華翼庶邦式瞻幕廷參諏乃僚是寄具官某隴
淬敏行發揮雅才祛煩體遠洞無盤錯首公絜矩樹為
風聲率西之行宣力彌劭俾進京服並光賓儀左右長
人叶濟嘉績往念褒擇勉毋怠忘

侯禧可節察推官制

敕侯禧率勵追胥捕格姦盜全伍就執賞目應條改陞

賓筵參寵朱紱往服褒擢增最爾嘉

尚書司封員外郎直集賢院麻溫其可開封府判

官制

敕具官麻溫其京劇居中尹正須輔必擇士彥參舉政
綱以爾優學麗辭清規遠概早階科等見重俊游屬膺
官簿之勤外樹藩條之最稍遷省戶還集書林蘭闡彌
薰井德無改宜資緣飾之美俾贊浩繁之寄

呂公綽可刑部員外郎制

敕呂公綽風猷華劭材力淹舉務時儒術邁訓義方間
從劇使復專清貫樹聲宣力所往必諧夫結課之條須
最而陟既挺明效豈無遴選宜進司刑之曹庸光滿歲
之法

袁易可比部員外郎制

敕袁易踐揚朝路肅給事經向委守藩式敏從政滿年
獻狀論績當遷聿圖勞勤用秩勾比揆榮恩報懋哉不
忘

戚舜元可比部員外郎陸仲息可國子博士王逢
士郭承祚並可殿中丞李從夏侯錫並可秘書丞制
敕戚舜元等三歲之限天道小成朕課吏勞稽法于此
以爾等文敏強濟業于官下經營旅力謹我詔條事無
度情文不諉上年比如今朝次遞遷省闈庠戶芸簽盾
局資踐有等襄進則同各仍前蒞蒞昭來譽

柳三接可大理寺丞制

敕柳三接向榮儒第久課吏勞所知之薦應條而至銓

覆有實擢叙為宜往丞御曹用啓榮序

陳紹孫寇仲溫竝可大理寺丞制

敕陳紹孫等竝率勤恭專幹煩監如職而辦閱歲宜遷丞佐寺卿勉罄賢瘁

商泰可大理寺丞制

敕商泰淹試吏勞綽著材譽監司廉狀保薦交章參贊課條已事皆驗俾遷卿屬彌勗乃勤

陳德之可大理寺丞制

敕陳德之以材自將所蒞時當監司廉狀保牘上聞以
其幕府卹淹治自參實俾丞于理用獎宿官

李定柳灝可工部郎中制

敕三歲大比令甲有條彙實最科庸信吾賞以爾定秉
尚淳固典學入官宣力幹裕華皓一志爾灝履吉材茂
廉智自將美實積中暢于事業偕籍秘館參為吏師或
權節財賄以資仰給或班布恩詔倚成嘉靖灼有見效
暴于攸司用置郎選式光考課竝仍事局益念懋功

鎮安節度判官黃炳可太子中允制

敕黃炳履操清劬局力精強歷贊侯藩休有嘉問所知
之薦交章以聞宜升諸家用階榮序當念褒寵毋廢前
勞

蔡亶梁堅竝可監察御史制

敕監察之任舉視行馬外事職竣望清匪才莫允以爾
蔡亶志美謀劬安節而不流梁堅識精意果蹈道而能
立竝試可有狀淹外累年比臺屬缺員邇列騰薦朕觀

其所舉叶于攸聞咸易法冠之華俾增朝路之肅毋過
毋怠時又爾中

鮮于亨可秘書丞制

敕鮮于亨素挺時幹寢揚仕塗最升有狀文飾無害攸
司考課年所如條書省有丞序進尤美尚宰劇邑勿懈
爾勞

辛若渝可衛少卿制

敕向科夫家充籍和壁明課衆寡以列幕科能辦其事

吾必而賞以若渝方守近輔克稟朝規悅勸趨力樂從
符伍以狀自上閱數應條宜遷卿棘之副以旌吏材之
敏

宋忠臣可水部員中制

敕宋忠臣敏于為政恪于守公不憚諸煩汔有成績三
歲獻狀申令著文俾正郎曹以旌吏課並宣爾力毋忝
茂遷

蔡襄知諫院制

案襄知諫院在慶歷三
年三月時祁方知制誥

敕蔡襄識詣冲遠履業端方含章立言望古為偶而讐
正秘籍棲遲累年懷國之寶戢而未肆朕方永惟闕政
思聞讜謀增員諫署高選才傑是用振爾淹卹光我簡
求進丞秘朕參幹言責噫諍引之道今昔異宜蓋論高
者虛而難從議瑣者卑而無體裁訂其要俾可底行往
哉惟虔欽遲中並

奏舉人平江軍節度推官王罕可大理寺丞制

敕具官王罕迺者深詔列位竝舉所知雖頗限吏資而

實取才劬以爾早勤官牒洊結歲勞比籍幕籌之能遠
光縣綬之選而名列薦狀課在最條宜循賞階入備卿
屬修方永譽以稱寵章

奏舉人前權興州軍事推官樂富國可大理寺丞
制

敕具官樂富國夫舉吏之格以監司為先蓋其試行能
察臧否審于他部故也惟爾上課比牒薦名皆將曹之
計臣糾獄之專使洎于郡將濟之朝紳保任一辭鉤校

胥協宜疇幕畫之最俾預卿僚之選

奏舉人前楚州團練推官蕭固可大理寺丞制

敕具官蕭固朝廷謹保任之科求才用之實覈方最狀
委于銓衡爾修辭策名效智從政頃以善畫介于列藩
而準詔之臣連章署行參觀閱式允褒嘉宜備屬于
卿曹且勸能于吏啓

奏舉人前平海軍節度推官知福州懷安縣李昭
選可大理寺丞制

敕具官李昭選鄉絲銓條序擬戎介墨以漢綬宰于閩
區而薦能交章覈課如詔朝有面命恩不庸私宜丞卿
曹用勸官最

鎮南軍節度推官前知袁州宜春縣廖宗禮可大
理寺丞制

敕具官廖宗禮鄉假賓簪往紆縣綬課無殿目薦有連
章銓審以聞旌疇有次宜遷聽棘之屬用廣甄材之路
前鎮江軍節度推官知蘇州吳縣聶德一前蘄州

廣濟縣令張保衡竝可大理寺丞制

敕具官聶德一等咸以通經備于補吏或列藩奉檄兼
委于字氓或大邑腰章游較于異課而行充薦牘年及
赦條宜疇銓格之勞俾率卿丞之職勉欽竝命毋忽攸
箴

前邠州新平縣令裴愿可大理寺丞制

敕具官裴愿早服吏資薦循選格勲勤縣譜雜有薦章
銓簿以聞賞科無廢宜入丞于理置且伸勸于官成

前江陵府佐司理參軍余貫可大理寺丞制

敕具官余貫藝文中科肅給將事比參府掾分幹理曹
獄無煩辭政有連最質于銓審名在薦延宜備刑卿之
聯且光材吏之舉

光祿寺丞集賢校理趙宗道可大理寺丞制

敕具官趙宗道夫銓審之最著于甲令所以育人材而
旌職業也以爾門緒華牕機靈敏秀早程賦札遂預書
林自服鉛黃之勤多分豕亥之謬沆茲歲滿嘉乃官成

奏舉人縣令韋輔堯可大理寺丞制

敕具官韋輔堯學古而官庇身為邑政均疲俗名在薦
章選格較勤吏資應賞俾丞卿法用勗銓流

刑部試到詳覆官縣令劉永錫可大理寺丞制

敕具官劉永錫故事上臺秋曹履天下辭案凡置佐率
屬必先試而後命亦以觀吏文責最目也以爾擢自縣
邑俾替坐曹能服簡書之詳且周星歲之限恩有成例
賞不爾私改丞理官尚典刑局

奏舉人前同州觀察推官張維師可大理寺丞制
敕具官張維師早服吏銓序參賓畫向贊名藩之重實
兼他部之勤且有連章稱宜厥職載稽官簿仍獲考年
俾改卿寮以振才滯首公絜矩勉副所知

刑部試到詳覆官司理參軍劉直可大理寺丞制
敕具官劉直故事天下具獄上書者皆本曹置屬覆視
而審覈之將充其官必試乃可惟爾擢自州掾隸于邦
刑紛披科條檢結凡最竭慮無懈質歲有成宜疇吏勤

進補卿案勉續成績思稱茂恩

奏舉人試秘書省校書郎前宿州司理參軍黃孝
先可大理寺丞制

敕具官黃孝先早服秀科游署勞牒向治郡獄參飾吏
文訖無訾豐多所澄雪使臺陟狀銓簿類能宜入替于
理官且申勸于公路

奏舉人前真定府司錄參軍焦盛可大理寺丞制
敕具官焦盛經明服官吏久隨調鼎參綱掾能督府郵

守將狀其廉端州宋申之慰薦稽于銓審應我賞科俾
改卿僚之華勿孤士類之舉

掄選人前永興軍節度推官知河南府長水縣事
張昭文可大理寺丞制

敕具官張昭文間命都銓擇吏之勤廉者假以部從事
而參宰劇邑實有允令圖其後勞爾今來思具質成課
既符信實之目宜服當遷之命往丞聽棘彌厲飲冰

內制

除婉容張氏封貴妃制

案封貴妃事仁宗本紀在慶歷八年十二月后妃傳

在皇

祐初

門下朕聞王者始風本乎妃德天下內治模厥人倫咨
擇邦媛之良飪敷嬪壺之懿茂推異數誕布公言婉容
張氏陶翕闢之和生慶善之族玉粹其度淵靚爾衷以
阿保之法自閑以圖史之誠攸服先贊內職叶升大猷
力殫沼之至恭襲珩佩之旋矩禮以為絢諒不忘勞用
嘉冲徽顯啓優渥進膺綸旨之貴參亞軒龍之華於戲

謹于順承陰教惟穆勤乃輔佐王化所經爾其念夕惕之虔躬日休之裕樛木之逮乎下然後稱仁彤管之紀其言于以垂美往席寵命毋忘訓辭可特進封貴妃仍令所司擇日備禮冊命主者施行

封寶壽公主制

案宋史公主傳寶壽係仁宗第十二女此云第十三女未詳孰是

門下朕聞自家所以型國治內本乎先親況天挺王姬邦著封典舉循厥舊今也惟時皇第十三女儲光嫔躋肖順坤極未覽古而知教故在姆弗勞雖尚幼而好仁

故處躬惟恪德範已就褒冊難稽是用涓選休辰焜照
蕃渥順格景風之懿播聞穰李之華商錫嘉名護成淑
質於戲周推車服之異漢啓脂澤之榮非曰親私繫乎
治體無替前習更竚來恩

除張耆太子太師致仕加食邑實封制

門下朕寵遇舊德欽揖高年固勞官職之務俾逸股肱
之老特申沖概庸厚邦風具官張耆資量沈雄規猷隱
濟被遇先聖宣力四方既昭元戎之毅遂幹中樞之劇

竄有茂伐居無間言進視乾台彌寵師節肆予纂紹並
復倚成入則參勤王家出則是憲方國能守其貴屢省
乃躬固將緊魁壘之良罄謨明之懿訢誨前席須績景
鐘遽披至誠願還所事勉諭已悉遜執不回且念大臣
重違雅志難奪與其屈任孰若便宜改儲師之華聽
上使旄之領衍其爰入尊以朝儀於戲抗請辭榮推恩
就第鎮天下之競予以稱賢保臣道之終茲焉有體勉
荷殊渥恬嗇太和毋專高蹈之介有俟惇言之並

除皇叔德文忠武軍節度使加食邑實封制

門下朕仰紹鴻烈惟懷永圖每糾宗族之恩疇先伯叔
之懿用推厥愛以展予覲具官德文道與粹和天俾忠
謹有言而踐百行成章而暢四支早建將牙兼穆台鉉
邦洽斯譽神勞以祥歲艾而精明不衰爵隆而悔吝彌
遠比詢朝論已啓王封尚圖久勞更膺異獎改疏假璧
之異進服溫貂之華仍廣轅疇以大租入於戲修人道
之睦我惟惇叙閱天下之理爾實老成並美翰垣參重

宗稷秉德陪義是惟顯哉

除皇兄允讓寧江軍節度使加食邑實封制

門下禮重祭膳寵伯仲之國詩標棠棣廣親族之愛稽
古教睦朕能行之具官允讓器令而固志和而立懿作
休德奮為嘉猷早秉中權之雄復正太宗之領協我公
姓光于前人間侍郊宮參獻彛瓚服攸歲而惟謹攝爾
儀而因愆向者已徇朝言特疏王爵載惟褒渥尚謙成
勞俾視秩于台階且仍華于將閫優實多戶併示隆恩

於戲武穆文昭其流斯遠元戎茂宰注意所兼爾其浚
明日攷蹈道時敏欽助予治丕纘膚功

除皇兄允弼武康軍節度使加食邑實封制

門下朕惟一二兄弟屏翰吾家每推骨肉之愛以強本
根之託矧在邇屬早休厥聲適及剛辰進膺異數具官
允弼甚德而度參仁以和居貴而罔流心訓恭而遠祇
悔間陪郊獻佐元宗司抑抑攸儀舉皆率履綽綽斯裕
內無違言成予叙親時乃修職比者雖疏王爵未厭寵

名宜傳後務之繁俾領元戎之制增食爰賦兼實幹封
於戲磐石而宗寄莫重焉扞城于國義莫先焉可壯非
猷可順非迪仍輟就藩之遠姑隆綏族之恩往惟懋哉
顯對嘉命

除皇弟允良安德軍節度使加食邑實封制

門下堯惇茂族於變是雍周建懿親時雍展愛朕參式
先憲褒序吾宗僉同公言誕舉恩冊具官允良氣韶質
美憑信厚之餘體和履順遠冲孺之習早經留務常止

金史卷三十一
上都以爾考有叔父之尊帝室之屏勛昭奕器慶裕後
昆向嘉冢嫡之承已疇王爵之顯斷自予志申付節旄
因具官儀衍實封社於戲古有謙訓汝其念聞夫寵不
期驕而驕從謙不待益而益附修也可以思永慎也可
以寡尤移孝圖忠欽服茲命飭躬靖位以即而藩

除皇弟允迪安靜軍節度使加食邑實封制

門下朕聞立愛莫先于親繁支實庇其本每念攸訓匪
伊異人用推敦序之典期光夾輔之體具官允迪承肅

天祐衍慶宸筭舉動嚴方趨覲暇敏思長富貴之守寢
肆朝夕之虔向留使華允穆公路頃以王邸殂謝予懷
悼驚念其堂構眷深橋梓維城有寄墨經還朝載隆近
屬之恩俾領中軍之節仍增食邑且實戶封於戲乃考
之忠勛四邦是式乃凡之光寵十乘有儀爾偕厥榮毋
或茲忝欽卽殊獎祇勵遠猷

除皇弟允良加功臣食邑實封制

門下朕率祖宗之常謹郊廟之饗迎日涓選熏燎告成

衍三靈之歡豫肆萬民之慶肯既飲其至因資爾勞矧
一二兄弟之親參陪夙夜之恪宜縉恩典以寵懿藩具
官允良履尚詳華機采明悟世不忘于濟美孝乃移于
事君王社以光帥節云重向因侍祀彌見協恭聞然陽
氣之休檐如盛服之美我禮尤具惟神克歆特緣膺胙
之頒首篤棣跗之愛進加功號兼拓爰封且詢中石之
規更增多戶之實於戲自天介祉既輯于上儀為國懋
能敢私于同姓往祇異數勤劬壯猷

杜衍加食邑實封功臣制

門下朕祇飭齋輅躬款泰壇昭事天明交修地察侑升
二后賓延萬靈昭鑒次于都甸欽紫炁于霄極越惟雋
輔相我盛容方錄解嚴之勤疇先嚴假之懋用信賞典
以告治朝具官杜衍清明以和練達而敏有罔伏之亮
奮于知恩有含章之美發于事業向圖克祀之盛允賴
若時之庸假節太庭告謚慈祐奉瑤冊而虔鞏祕金鎮
之邃嚴而又率籲攸司奉行故典牲牷博膺玉幣精純

接神明以歆馨塞穹壤而凝祐遂頒大慶胥洽衆歡永
言皤髮之良欽從屬車之至職勞而賞惟敏則功宜增
號表之榮仍崇階等之貴廣開厥邑優實乃租於戲靈
眷備成恩章差沛所期君臣有以相戒休息有以無疆
熙其未明瞭其未睹俾又予治聿暢爾猷

賈昌朝加食邑實封功臣制

門下朕昭事天地哀侑祖宗九州四海畢來助祭千乘
萬騎并據上儀眷我輔臣相惟元祀訖紫營之升燎肆

王較之解嚴差叙厥勞疇先闕賞具官賈昌朝挺秀崧
漢儲精本元撓之彌澄宏德量于無際汰焉不耗植忠
賢以自強台樞踐更文武參式自善祥之歲習凡用度
之日咨問臨路朝前遣鴻冊實膺使節之重往祕后祐
之藏至于入侍齋居出陪奉引官師象物供帳無勞成
上帝之居歆綿中區而敷慶竣于大事時乃協恭是用
著美號以表勲叙崇階而峻等即邦進爵衍食疏封萃
為寵章式顯優數於戲祭而受祉眇躬難乎獨饗賞弗

淹日同體示乎仰成益圖夙夜之虔交修大小之務靡
否不替有猷而為永孚天休茂對嘉獎

王貽永加食邑實封功臣制

門下惟天祐德惟辟事天率三歲而合享總六飛而出
次雖居有常處用有定規至于訪逮典彛祇飾容采眷
吾近弼預有勞焉惟是圖功曷無畱賞具官王貽永行
本和懿謨函寅亮公忠交奮賢戚兩華叶修對越之虔
參陪陟降之恪事皆如素人罔告勤普羣望以懷柔震

萬祥而翕習已敷鴻慶遂策茂勲嘉夙夜之方將顧臣
鄰之同底是用並以寵號冠于美名拓井邑之故封實
租食之新數於戲神貺繁祉既惟倣于兆人朝論獎冊
遂敷施于有位尚當念治之所由治處休而勿自休共
守洽平滋懋丕績

特授李德政加食邑實封保節功臣制

李德政係
交趾郡王

門下朕躬執玉幣祇見郊丘率萬官以承序職百神而
有次薦誠以德蒙后皇之竝臨推福為恩塞穹壤而偕

扞眷言列位助歲上儀內則相禮之虔外則獻力之恪
用當飲至均第有勞具官李德政秉心懿恭執義光大
昭啓王社安安裔人載甲令以輸忠航貢品而綿險一
我尉候保茲東南屬欽柴之告成前景風以覃賞爾乃
作扞時予不忘宜益表功之華俾旌守方之重陪敦封
邑衍實幹租於戲天瑞神祺紛流于中野朝俞國需敷
錫于列藩尚膺典冊之榮愈圖彛器之績懋哉夙夜永
綏爾邦

景文集卷三十一

欽定四庫全書

集部

景文集卷三十二

四

詳校官侍講臣王燕緒

檢討臣何思鈞覆勘

總校官候補中允臣王燕緒

校對官學錄臣謝登雋

謄錄監生臣汪國均

欽定四庫全書

景文集卷三十三

內制

賜中書門下詔

宋 宋祁 撰

敕中書門下朕聞至治之世天下向化元凱共朝不為
朋黨房杜相濟不為比周君明臣哲垂榮無極何其德
之盛也朕昨是銷志每用庶幾思所取法未知厥路而

承平之弊澆競相蒙姦隨法生偽逐情動假我王爵樹
為私恩所憎則同口共訾取一切之快所善則併辭迭
譽希不次之遷遂乃人務交遊家為激訐至于陰開納
賄之請陽託薦賢之公居下而圖柄臣順非而動偷俗
附離交扇流蕩忘還更相援接以沽聲譽由是人士以
行怪為美辭賦以訕上為能放肆異言詆斥前聖謹流
羣口虧素彝倫又頃正按察之名謹推擇之選俾將明
命以慰多方而奉使不稱繩愆過當恣苛刻以搖羣怨

織纖微以構罪端守倖則互責刺廉令尉則更容伺察
上下疑貳奏鞠交橫未益治平之風反成多辟之暴向
申勅戒殊未奉行朕疾夫為國生事之徒背公死黨之
俗推狂濟果去簡成煩况長吏者務在全安刺舉者素
有條禁民如馭馬安得駭驚理猶亂繩弗宜遽急當求
大中之順漸致清淨之原至于屬文之人體要為急苟
專非聖之論寧免疑衆之誅自今者詭激邀名浮薄連
茹用察以害良善倚法而峻誅求雷同私論營罔朝聽

竝委中書門下御史臺采察以聞故當責其不悛懲乃
敗類罰之無赫今在必行咨爾有司咸體予意故茲詔
示想宜知悉

賜中書申明先帝賜文武臣七條戒州郡詔

勅中書門下湯德至盛著具儆之言漢功方茂下督責
之詔于時中外協念以趣大康朕顧眇躬託王公之上
明弗能燭數有未通每念付畀之勤治平之詔日慎時
惕罔敢自安庶臻至治無羞先烈是以畿府州軍監縣

之長居常推擇部分總督屯邏之委一皆僉求亦冀羽
翮叅翔腹背偕奮手足迭扞心膂獲寧今乃聞郡邑庶
官未能稱職紀律耗廢真偽混淆或自謂謹柔既難集
事或矜為強濟又匪恤人或朝夕詭激而望改遷或歲
月因循以濟貪冒或廣飾廚傳掩簠簋之瀆或曲奉監
司逃簡書之劾緣令作詐倚公殖私頃者以邊鄙未寧
師旅四出既不獲已調發于民隨輒戒勅勿令煩擾然
而斗粟未漕民有一鍾之費匹帛暫輸更有數練之入

與我共此所望責成為上歛怨任將安寄以至盜賊屯
結公行劫掠上下畏懦弗能擒討驚騷閭里盜弄庫兵
士非素習之專患無豫防之禁永言茲事寧忘朕懷跡
夫弊生實始官濫恭以先皇帝欽睿明翼達見治宜親
著七條垂戒百執每辭去之日普令拜賜凡從政于外
舉得奉行羣臣亦有刊石傳文題屏示坐朕以為既能
尊戴曷若踐言幸獲親聞便當立事其外任文武臣僚
等自今以來務革前失聿新後圖以聖考七條更相誨

勗置朕此訓亦復研尋為仁由已取則何遠上尊先甲
之諭次謹申命之虔攝爾類網綴我漏目使美課歲茂
善狀日升則隆名顯秩朕將何吝必若斯究弗禁農晦
卒萊論報誣冤徭役重困不恤士伍不訓武經拜有明
科朕當必罰浴爾有衆無謂食言故茲詔示相宜知悉
賜北京留守資政殿學士工部尚書程琳并知相
州宣徽南院使保靜軍節度使王德用撫問詔
教程琳等卿謀畧沉濟忠款精強眷言守屏方倚風力

而邊州上奏屯旅鞠凶雖遣招懷亦資防遏綏訓士衆
犄角封陞明為指蹤以俟安堵

賜新除龍圖閣直學士知成德軍府事田況詔

敕田況省所奏乞罷龍圖閣直學士只以舊職知成德
軍府事及有河北經度機密事件欲乞暫乘遞馬赴闕
入見敷奏事具悉卿有仲舒之文翁歸之武毅然施政
萬夫所觀故易以近職殿于大邦克竚方畧寢擔邊陲
遽露至懷願仍舊秩擇才而授羣議所同往諧官守毋

或勤讓比又邊臣失御戍伍即擒眷惟都會尤須鎮輯
特蠲入覲便即之藩當體眷期益奮忠力

賜任布詔

卿年德兼艾憂勤是力向者憫煩機劇是用許三城之
行雖使嗇神亦資坐鎮何所謙避即以將老為言惻予
朕襟似未深諒且洪樞之佐黃髮之良非與庶工輕于
得謝宜安吉履第守奧藩臻蕃福胙以副衡倚

賜知鄆州宋某詔

勅宋某省所進奉阿膠一合重五十兩緋羅夾複裏事
具悉膠品之貴阿井為珍卿適茲守土勤于作貢順時
熬液凝劑甘新恪稟彝規參旅方物區產云美料治所
須推處厥誠嘉歎何已故茲詔示想宜知悉

賜知審刑院事丁度詔二首

勅朕念細人無良庶獄未措每于決事憫然疚懷卿鑑
融機敏騁無停奏平疑錯枉洞得其情乘此長羸託夫
論執況海區甚廣按訊日來能致少閒固亮勤職願紀

直筆彌悉至誠歎悅所兼不忘于意仍依奏宣付史館
敕丁度省所奏今月二十五日已前送下公案竝已約
法斷絕了畢別無見在文案事具悉嚮以官師既衆賅
冒相尋廉刻之奏猥騰論報之文四出每加申勅無及
細苛卿有服念之勞簡孚之謹鞠讞雖畏報下無留旬
歲之中停奏于冊削章歸美宣力有勞嘉其悉心之功
成我措刑之漸載惟歎尚弗忘于懷仍依奏宣付史館
故茲獎諭想宜知悉

賜杜衍乞退第三表不允斷來章詔

省上三表乞保餘齡授以散秩事具悉卿有隨會之忠
任隗之正易之甘節洪範之有猷是以叶都公議付俾
樞管方事之總勤勞王家夫推之同心不容有間久于
其任乃克懋功洵閱奏函殊乖茲指且卿屬疾雖屢揚
休不衰魁然華皓為朝著碩用及四載便欲引身徇高
全亮自安沖養使天下之論謂朕輕于進退貳于眷毗
得無傳聞重吾之不德也況謀謨未究方當匪躬邊鄙

云騷詎獲高枕昭體大誼即斷來章定志宿官熙我不
績所請宜不允

賜權知開封府吳育乞解京府不允詔

敕吳育省所上表乞解京府授側近一郡事具悉卿志
力開濟飾之文敏京轂操決號為詳明庶邦是則繫乃
之寄胡遽披請願去浩繁況具獄報論即情甚細從宜
報據在職當言雖不果從要之有守宜祛嫌慮以副眷
期懋哉夙夜式永休譽所乞宜不允故茲詔示想宜知

卷三十二
悉

賜章得象讓職第三表不允斷來章手詔

省三上表乞解重柄事具悉朕聞君為元首臣作股肱
相須為體是能有濟朕荷祖宗之構臨制萬方不明不
敏每用自愧賴天之福寓內以寧惟一二柄臣輔其不
逮丕承執競以克厥庸卿毗佐七年終始一節鎮浮以
雅伐叛以謀載其清靜紓我勞疾俾朝威主惠震疊光
明時乃之功冀懋台德今確徇冲尚引避宰司求申所

懷未喻前答永言大誼當存至公何嫌何疑自期獨往
若然則元首之眷股肱之司得無用違以忝成訓母或
封執容適大中即斷後章式副朕意所請宜不允

賜田況讓職不允詔

敕田況省所奏蒙恩授起居舍人陳讓事具悉向有邊
臣無良戍伍亂挺殺害官吏驚騷里閭懼而歸命罪乃
斯得卿適往臨撫善處便宜蘊夷渠惡分北支黨曠然
按堵後無餘災嘉此成效已令進秩何循謙執乃乞讓

還賞惟值功朝靡收汗當祇厥命方職爾勞所讓宜不
允故茲詔示想宜知悉

賜王貽永生日詔

譜閱華勲風猷沈力親則副馬幹惟中樞帝錫予佐實
表賢運仲月之魄厥生記辰世祉蕃昌家宗歡籲就頒
牢飲茲異寵光俾壽且祺敷暢勛績今賜鄉生日羊酒
米麪等

賜韓琦生日詔

謀府強濟忠概沈詳幹予樞筦允穆王路時惟生日有
煥慶宗家情美于高門邦論寵其名世特頒多物庸示
褒懷牽釀有常躉繁兼列合而姻族續爾期頤今賜卿
生日羊酒米麴等具如別錄至可領也

賜杜衍生日詔

思皇雋輔對我盛期遠跡名世之來顯符資弼之比予
治云洽乃功不忘克生紀辰胥慶參貺雖綠顧復之感
方樂艾耆之華用遣使人就頒牢品既昭恩眷且及爾

私

賜宰臣章得象生日詔

帝賚茂宰與朕同心翕受九德修明百度亨期賢運交
相為華今茲誕日固有常禮饗人酒正各俾往頌一以
申祝永年一以助樂私聞錫爾難老副我眷毗

賜宰臣文彥博生日詔

崧極憑粹寶啟周朝昴躔融照是生漢輔眷我良弼挺
厥世祥式倚爾才以佐台德日惟載育禮厚有初俾洽

宗黨之歡用頒羞飲之具既推異數具熾茂齡

賜參知政事賈昌朝生日詔

挺秀民彝協美賢運慮合著蔡道侔絲繩參裨暇假穆
我元化今茲誕日尤驗世祥況稱壽親闡交慶私室宜
頒多物以助胥觀仍續永年之祉圖終亮采之績體予
褒矚即當祇膺

賜參知政事范仲淹生日詔

八月二十九日生

蔚有雅才生此王國參幹萬務朕與嘉之載誕及辰糾

族胥慶宜有優禮以重邇臣既昭名世之顯兼資式喜之具申續難老滋奮大猷

賜樞密院副使晏殊生日羊酒米麪詔二首

進止方重謀猶粹果燮定台緯參決樞華民瞻國論浩然胥協天挺俊乂符我治平知及誕之辰懷顧復之慶宗戚歡祝宴喜相存特此頒分以重褒眷今賜卿生日羊酒米麪等具如別錄至可領也

碩學冠時清心照理昔侍帷幄在衛翼以勤勞擢貳樞

機當論議而沈正載聽惟崧之頌適臨生甫之辰俾永
屆于遐齡用特頒于禮餼膺茲寵異諒體眷懷

賜樞密副使張士遜生日羊酒米麪詔

貳職天樞同寅相室忠勞允著廣益居多屬茲生育之
辰特舉匪頒之典式介眉壽永停嘉猷

賜陝西四路沿邊經畧招討都部署司教

朕卹軍旅之苦寵邊陲之良事從優寬情無遘愛至于
常愆細過竝許功除煩文苛法罕由吏議昨滕宗諒張

允竝緣事任合給公用庫錢俾其宴享賓僚犒飫軍伍而乃用度無藝簿領失防陽託貿營潛有年久攸司言上遣使即推如聞逮繫頗多鞠劾彌廣本其冗費寧足深誅已罷案窮悉令原貸其滕宗諒等止免一官量降差遣雖屈吾法期慰士心且夫盡用市租美推趙將來從我取誼表漢臣每慕前風思全大體尚慮諸道帥守便以茲事為懲或損狹餽章或裁量藥餌苟存畏避謂免譏彈胡益至公亦非朕意但當循經費之式去自濶

之私取仰于官均惠于衆由茲底績夫何間然安節坦
懷毋或疑憚

賜南平王李德政歷日詔

按即交趾郡王

頒歷之義以初為常俾一天下之歸用謹人時之授以
卿列壤南裔率職本朝宣我恩化慰彼黎庶每屬歲元
之會必榮廟朔之藏朕亦推處襍祥裁輔舒慘申命太
史分次左方宜按象以奉行表布和之胥洎特茲馳錫
勿怠欽承

景文集卷三十二

欽定四庫全書

景文集卷三十三

宋 宋祁 撰

內制

賜樞密副使王堯臣生日禮物口宣

識裁精深器懷冲劬典司內密參慮幾微惟素篇之導
寒屬左弧之屆旦禮優近府恩著上臺加惠餽牽侑驩
醪酒庸厚樞庭之數且為族宴之榮當體寵私所宜祇

受

賜樞密副使孫沔生日禮物口宣

才居上哲地在內樞懋宣一德之規協贊萬幾之務迎
長紀候載誕協辰錫以縹醪頒茲生餼用示臺恩之厚
且資族宴之榮當體眷私所宜祇受

賜樞密使宋庠生日禮物口宣二首

俊乂大臣耆明舊德首正開序載誕協辰爰命寵頒所
宜祇受

元精異稟大雅克生蔚輔本朝亶有盛德誕惟吉日慶
屬首正國體同休臺恩著範餽牽有碩醪酒惟醇用助
宴私式精禮意

賜宰臣劉沆生日禮物口宣

任重台司寄深時柄爰屬誕辰之吉用稽蕃錫之文式
示眷懷且昭毗倚

北京賜賀正旦兩蕃人使御筵口宣

卿等遠涉歲陰並趨元會馳軺永路彌節離都乃眷歡

勤俾均宴勞

班荆館賜契丹賀正旦人使到闕御筵口宣

卿等肅持邦聘祗會歲元載驅使壯之華已舍郊郵之
通用仲宴犒參慰歡勤

賜王德用酒果口宣

卿持節之藩出車遵路已涓良日宜重祖行飲具臨頒
予懷增眷

就驛賜契丹賀正旦人使錦褥被銀鈔鑼唾盂

子等口宣

卿等馳止使軺憩茲賓館勤勞備至休沐攸宜特頒器服之華用適宴居之便

賜契丹兩蕃人使賀正旦酒果口宣

卿等已展聘儀稍淹賓次年華集貺節物多歡各適所懷無嫌樂飲

賜契丹賀正旦人使迴北京御筵口宣

卿等肅馳歸傳還舍離都得無道路之勤加涉陽和之

始宜申宴衍式慰征行

賜王德用御筵口宣

卿肅持瑞節近撫价藩出宿在辰祖行增悵宜申異眷
敷錫宴羞

雄州白溝驛傳宣撫問契丹賀乾元節人使兼賜
御筵口宣

卿肅將歡幣來會慶辰涉遠已勤入疆云始俾陳宴豆
少憩征郵

北京賜契丹賀乾元節使副御筵口宣

卿等並飭使華恭趨朝慶已舍離都之近諒多持節之
勞俾洽宴慈用昭眷渥

撫問契丹國信使兼賜御筵口宣

適當盛暑遠駕輶軒惟辭命之是恭勤道途而罔憚特
頒宴具聊示歡慈

賜王貽永批答

樞宥之地任切喉襟朕選爾忠慎參此機劇自頃狡寇

時擾五邊屯戍調發事多平日卿宣力念治義無不為
方倚斯猷以底嘉績何所嫌間堅避寵名況易退者士
之細概責成者國之本務惟卿深識宜諒朕懷累嘗批
復理無順許往安官守即斷來章所請宜不允

賜杜衍乞退第二表不允批答

西土未靖師久留屯朕賴卿忠果幹總樞軸宣力四載
既有成勞今抒懇奉章願去機任夙昔惟念未得其由
將謀者精而聽之粗歟獻者衆而從之寡歟中行亮節

得微有慊間言飛詆朕無聞焉何遽卷懷欲徇沖潔雖
安小諒有缺大猷況柄臣進退繫民休戚幸勿煩執方
倚咨詢所請宜不允

賜章得象已下批答

南方壽星每歲為候今見于庚寅甲夜澤潤燁明揆占
惟應君其逢吉卿等樂聞瑞兆鋪述慶辭欲以美祥遂
刊實錄勉從所請良用缺然

賜章得象乞罷第一表批答

卿識度閎遠謀謨淹正比圖舊望爰冠上司而勤勞王家朝無異議翊戴寡德朕所自知雖輔政七年已究丕績永惟萬務方倚厥成遽閱奏封願歸宰柄詳觀所啓憮然動懷且軍革尚興權綱須乂實賴元弼偕陟大猷儻獨徇知止之高而外愆為國之計君臣同體既不云然進退大方亦將未亮姑停遜執以副眷期所請宜不允

賜王貽永讓恩命第一表不允批答

卿有林父之忠吳漢之謹匪懈于位無伐厥勞自幹樞
庭多歷年所參和以濟大事先計以叙諸戎功成弗圖
報于何有用膺置使之重以疇基命之勤誕告廟廊宜
無異論遽披露奏方切沖懷誠有敦于雅俗詎所期于
同體官不容曠命則惟行往哉爾諧昭體予志所讓宜
不允

賜杜衍乞退不允批答

卿更踐劇職遂冠內樞鯁亮之素底衷無隱朕得朝咨

夕訪克又權綱比日以卿懇幅致辭感慨祈罷因有前
旨欲賒後期冀介節孤操終為事屈忽閱今奏殊乖此
心且詩重老成之謀史稱魁壘之輔皆作時模表寄國
典刑未聞茲人以年為解也矧疆陲務總輶餉日疲共
濟艱難萬賴忠力宜徇公議毋滯沖懷所乞宜不允

賜杜衍第二表乞退不允批答

國家左宰府右樞省二三執政皆諸臣之選朕所與均
休戚責謀謨任天下之綱維者也其于進退可輕議哉

卿直清方嚴明銳開濟裁抑私謁達練事經洒然羣望
推為碩老朕方倚以機管隆乎治平而累章求罷弗亮
敦勉何專以已伸而不為邦屈重于獨往而忽此共濟
耶矧年高慮精道勝疾損固當務近醫劑參實陽休安
服而官姑惠予采所乞宜不允

賜皇叔德文第一表不允批答

卿茂親夙望台鉉將牙澹焉沖遠躋于華皓聿圖庇本
特用推恩僉疏郡封光啟王爵宗盟為重國論既孚何

列謙辭尚停寵冊便當祇受以副褒懷所讓宜不允

賜皇兄允讓第一表不允批答

朕惟強幹之誼公姓攸先列爵之等王封茲重以卿志力忠謹屬望親賢庀秩本宗領節戎鎮休有令譽當圖爾勞用擇蕃要以光書社何煩露奏尚執謙懷況定命既頒公言胥協毋淹寵數速即欽膺所讓宜不允

賜杜衍等批答

保章視夜南極告祥雜候靡差圓暉有爛聞之典緯屆

乃壽祺卿等幹掌內樞歡逢嘉應露封率籲溢美形言
徒亮勤誠尤增慙德所賀悉知

賜皇兄允讓第二表讓恩命不允斷來章批答

卿屬懿地崇望華志美朕所以推常棣之誼重盤石之
宗始啟王藩聿茂恩禮尚披沖蘊再列讓封況普告官
師布聞方國頗稽典命未副眷懷容略常讓之執即光
外日之授所讓宜不允仍斷來章

賜杜衍陳讓加恩命第一表不允批答

朕躬祠于郊蒙帝之福推為慶典徧第衆勞以卿總秉
中台顯相大禮謹有司籩豆之具罄三事夙夜之虔值
功而賞有國常典何煩露奏願寢茂恩況普告于外朝
方驛騰于成命便畧牢讓往服寵章所讓宜不允

賜杜衍第一表讓恩命不允批答

比虛右弼以須峻望卿清約忠壯華皓一節出入諷議
靡事不為挺然公實見于有政朕志先定成命惟行況
萬幾處可百職修理朕所倚辦卿宜知之遽閱讓函猥

徇謙槩且誕告羣方不容顓辭久曠台路便廢撫遜欽服寵章所讓宜不允

賜賈昌朝讓恩命第一表不允批答

卿曩侍經筵已知國器歷守京邑則風績早樹進領邦憲則威名流聞陽休山立自處中道朕以為履正識敏材任輔佐引預機政參貳台司曾是踰年休有成效觀行則懿俾謀則臧斷自予志冠升樞省誕告百執初無異言猥露奏封深存撫遜況訓諭已熟典命難淹速即

欽膺以光朝舉所讓宜不允

賜杜衍讓恩命第二表不允斷來章批答

向以戎醜尚桀師伍留屯公私乏匱不可貲省又官濫
于外吏欺于中苟察過當浮競成俗濟水無益治絲愈
棼圖所振整未知厥序以卿久在樞禁習總事經年耆
識茂盡瘁事國是用選自予志對秉台衡藉敏材以康
調發之艱褒介節以懲進取之弊朕既寡德方茲仰成
尺奏薦聞能讓猶固已嘗批諭宜體眷求毋煩費詞早

膺寵典所讓宜不允仍斷來章

賜皇叔德文陳讓加恩命第一表不允批答

上帝居歆億祉叢介朕不欲專享衍為太和遂差慶典
之錫均逮懿親之序以卿耆德碩望帥節王封藩翰維
持宗盟磐石已從僉論俾進寵章何需奏之遽聞列謙
懇而尤至但自絲而紵已告于朝惟名與器靡虛其受
便當速拜毋久留恩所讓宜不允

賜賈昌朝王貽永皇弟允良陳讓恩命第二表不

允斷來章批答

饗帝勞旋錄功論賞叶同與議肆舉恩章卿左右有庸
授受惟允尚牢所讓洊露乃情況朝冊久淹詔文已報
當膺繁異之數即矧對揚之華深體眷毗毋致謙執所
讓宜不允仍斷來章

賜陳執中韓琦讓恩命不允斷來章批答

朕比執珪幣祇事神祇至誠所向鴻釐如答是以推行
天祉沛流茂恩徧錄侍祠之勞悉從進律之典卿卓有

成效協于僉言而臨榮引讓稽恩未拜閱露章而既熟非公論之所期便可欽膺即廢謙執所讓宜不允仍斷來章

賜賈昌朝讓恩命第一表不允批答

朕聞元首明哉股肱良哉治之所隆也元首叢脞哉股肱惰哉弊之所基也惟德不敏承久安之餘淑慝混淆紀律玩敗思所以振弊興治光輔朕躬惟卿內挺剛正外體和順不疲于利自時厥中參陪宰司則夙夜以虔

幹總樞會則細大畢舉爰立作相用乂我邦公言穆卜
浩然胥叶用擇剛日誕告外廷何徇光謙尚崇至讓沖
懇雖列允領已頒毋執難進之規速副具瞻之美所讓
宜不允

賜賈昌朝讓恩命第二表不允斷來章批答

卿慮經王體氣陶天倪挺處淄磷之表不從燥濕之變
鎮定大事贊襄遠猷朕用希則哲于前聖俾實相于寡
德僉都輿論亮成庶工比程尚方之封猶堅匪席之讓

況典策中出朝野具聞便廢道風往穆台路所讓宜不
允仍斷來章

賜王貽永讓恩命第二表不允斷來章批答

朕以二陞雖靖五兵未橐總幹樞劇實賴忠蓋以卿久
副機務用正使名外詢諸朝內斷于志用降茂冊初無
異言何執沖避游騰章削況官以懋德非可專辭言惟
作命詎宜淹拜便屈謙槩往服朝恩所讓宜不允仍斷
來章

賜皇叔德文讓恩命第二表不允斷來章批答

夫先睦九族後協萬邦朕常夙夜庶臻斯路況卿信厚
舊德華皓高年師學彌惇懿行無擇比詔王爵未塞公
言亟進常伯之崇兼易許田之輔成命旣告有位具聞
何飾讓懷洊列需奏且茂冊備物不可久停孤風介尚
無容封執宜即欽受仍斷來章所讓宜不允

賜新除皇兄允讓讓恩命第二表不允斷來章批

答

卿風素詳劭識理淹該協綏同姓預有成績向啟王社
未極寵階特視台宰之隆仍增戶食之衍涓日誕告付
外遂行何列奏封再執謙固且作藩之屏誼切先親自
絲而緡理無中止往膺冊命即斷來章所讓宜不允

賜皇兄允弼讓恩命第二表不允斷來章批答

先親右戚為國通規讓牢退易處躬常介向以卿雖列
王爵未副眷懷申付將旄庶重藩屏再閱來奏殊昧所
期況國典朝章不容停拜家情邦禮安得顯辭便略沖

儀往諧茲授所讓宜不允仍斷來章

賜章得象乞罷第二表批答

朕以涼寡統制萬幾涉淵俟濟凜然祇錫是用擢卿俊
望熙我庶工而謨明弼直早允羣議隱正沖坦自表素
襟懿德所孚不仁胥遠朕庶幾同底于道克綏永圖而
游騰露章求諉時柄已降諭答尚執所懷況獨行之高
未足多美勿貳之倚何容執嫌當畧謙言往安宰政孤
風靜概徒與嘉焉

賜郭承祐批答

朕以卿有初載之遇有離衛之勤毅然能力久而弗懈
用建戎節聿圖爾功告于外廷亶無異論何飾牢讓再
列露封夫服謙沖語崖分治躬之偏亮膺名器建勛伐
徇國之大方所宜欽副疇咨畧去常執況師兵寄重河
防事叢董訓有經領護云劇無淹定命趨服茂恩所讓
宜不允仍斷來章

賜皇弟允良讓恩命第二表不允斷來章批答

向咨公論大敘懿親緣鄉王社申付戎節成命誕告多方普聞洊啓讓誠尙執沖介汎渙汗已出備物久稽宜廢沖懷時膺恩數副予眷厚即斷來章所宜不允

賜皇弟允迪讓恩命第二表不允斷來章批答

朕敦睦懿親差次寵典年長者崇爵屬近者尙恩眷爾忠賢用加節制公言斯協朝渙旣頒何執常謙欲遂素守道風雖亮允令難稽往哉惟諧毋或煩請所讓宜不允仍斷來章

賜賈昌朝讓恩命第二表不允斷來章批答

朕惟師旅久興邊境弗瞻樵然日旰靡遑祇寧卿材謀
有聞政事已試疾風弗偃晦雨不渝用加寵秩回總樞
載至于轉調兵食結納邊庭伐謀授算攸寄斯重何徇
常禮再列奏封以嘗敦勛心難開許往諧爾職即斷來
章所讓宜不允

景文集卷三十三

欽定四庫全書

景文集卷三十四

宋 宋祁 撰

頌

皇帝神武頌

樂仁宗本紀乾興元年六月誅雷允恭七月敗丁謂此篇當是祁未登第

時所

作

或稱皇初之世不賞而勸不罰而懼豈簡冊之彌文哉
議者云否彼固未識夫震耀之飭天威剛健之奮乾體

也粵若聖人制海內之命據天位之尊總秉權綱章叙
典憲不有威僻不足以震元惡不有變容不足以開至
聖用能消弭殄行嘉靖多方闡皇靈憲宗軌丕天之大
律一民之至權者已巨宋在宥列聖繼統際天丕冒亘
地砥屬仆威械以去殺襲道樞以訓儉恩裕洪暢容典
飭畫萬寶取足合祛于皇極百靈隤祉震動于珍物然
猶右賢左戚均權布寵百辟箴閱內平而外成五細在
邊番休而遞上防檢來患蠲滌多辟懃懃懇懇者非弭

亂之謂歟然而善制未能無敝有憂所以固國迺者先
帝違俗羣邪濟凶寄朝家之威席鈞宰之貴侔尚方以
制罷狎神巫而締紱乃至易守帥以漸醜圖徙陵兆而
投天隙拂戾蜚語恬有奸計遂欲包禍心以竊發執左
道而干紀餌臬羹以未盡礪射牙而密噬神靈震赫奸
宄呈露輔臣建白醜黨震壞赤車具獄而來上凶豎伏
鑕而前死尤恭事敗先謂伏誅皇帝陛下深拱諒闇覽
照前典重當國之職慎退人之禮詔曰冢宰之任萬樞

所係今丞相謂自底不令其上大司徒印綬于是三事
百執抗疏以請曰無將必誅列辟經制與衆共棄常苦
無赦謂今所犯惡不可聞願鑿天刑以塞羣議帝曰朕
不忍致于理其放于朱崖然後起跼弛之臣明枉結之
獄掎克之貨輶上于官附離之黨肆赦一解漏鯨基于
網目摧虎吻于市道浴白日以升景投紫蜺而霽氛惡
草絕而善苗興清風翔而羣陰伏人靈紓憤道路相趨
既而薦紳之徒相與喟然竝稱曰前日末命微梗孽臣

乘間潛搆不類陰傾時柄食黷靡化指莠待滅陛下探
觀時變先斷宸慮倚文母之聖攬列辟之議廉者剝殄
介不終日末減澄洗蕩無餘災定寶業極南山之安殲
渠魁易家人之召智不回慮惡未旋踵事已決矣昔滔
天殛而虞功劭流言故而周德奮觀闕誅而孔制列寶
瑟僇而漢基永皆撥亂之盛準長世之懿冊所由來舊
矣是以烈祖二宗壅蓄除害蕭勺衆慝若彼之難也太
后聖上建威銷萌祇邁先訓如此之備也宜乎勵無前

之景鏐暢不殺之神武正春秋謹始之制釋洪範作威
之害開賜無疆之眉壽摘著不朽之尊名此其時矣蓋
天子穆然初載財成仰定未遑論制作之事也下臣儻
擬末品不足弦次新頌輒敢述與人之詠簡康衢之詩
亦擊轅折楊之比耳其辭曰

真宗御天休息羣元委裘上仙茂功全今皇帝續務惟
新百度尚文右武鴻基固今孽豎柄臣矜權取勲興妖
放命託機神今上公列辟協忠宣力摧兇殄惡清君側

兮曰恭曰謂銜刀投裔神武不殺退以禮兮或附或離
橫貸敷施脅從罔治董之威兮氛開稷收美澤雲游荷
天鴻休德既優兮昭雪忠良興頌風翔寅威舊章恤無
疆兮

大有年頌

并序

客有問臣曰民生有本乎臣曰力田為生之本也王道
有初乎臣曰養生王道之始也客曰方今表裏悅豫上
下充足竝眎之瑞翔集太和之氣浩作億姓字遂萬寶

登成震無疆之休獲有年之瑞抑此之由乎臣曰唯唯
有之願客少暇請舉凡而述焉洪惟巨宋之有天下垂
祀六年卜世彌億道暢于不宰澤寢乎無垠御羣生之
重畜始乎兢業治大國之小鮮終以清淨薰然化成之
文治內毅乎不殺之武治外神禧蒙被黔庶蕃息格于
上下唐堯之允恭及乎昆蟲周家之忠厚湛恩宣洽醲
化普暢聖人有以探天下之蹟成天下之務屏華處厚
抑末敦本服絺衣以訓儉黜拱璧而進道碧砮文鉞弗

輸內府之貢珍禽皓獸罔充內閑之玩齊官省三服之費長楊罷周法之侈土事不作無執扑之謳木功不彫有翦茨之陋闢三面以弛罟措底劓之刑班十行而需渥懋景風之賞足食去兵而信立既庶加富而教備何則薄來之財易豐也悅使之民易勸也較畫之法易守也無為之道易化也若夫域民而為之限勸農而置其使勤恤人隱丕冒海隅候田星而建祠謹農事而紀節惟穀是寶務實九年之蓄經界既定式資什一之法萬

倉箱之攸積俟禮節之興一夫婦之弗勤懼飢寒之至
不獮狝乎鳥獸四靈以為畜不童竭乎山澤萬物得其
所圓禁弛而芻徃海租免而魚出備物優裕嘉生報降
螟螣銷厲畝澮流惡崇朝之雲遂遍納麓之雨弗迷其
豐年之祥有如此者仁博而愛貌恭而肅角民而不亂
木作而曲直以正春令禮大而易視明而哲徵事而不
墮火烈而炎上以蕃夏物義宜而斷言從而順商臣而
不壞金利而從革以肅秋成知崇而周聰聽而謀羽物

而不危水流而潤下以畢冬氣五躔不擾四時不廢爨
倫灼而可序順氣凝以成象其豐年之感有如此者時
隰彌望鮮原相亘秬芟芟而舉趾桑閑閑而樹宅鄰子
之稻咸藉周兄之菽可辨異畝同穎有方阜之堅一稊
二米無滅裂之報地錯如繡渠決成雨多稼不害著曾
孫之謠滯穗靡收伊寡婦之利田畷之饁迭洎黃冠之
蜡畢達菽粟之行譬水火之可求耕耘之速若寇盜之
將至其豐年之獲有如此者事以中舉歛以時入鄭人

無爭承之賦漢倉有相因之粟以實府庫則錫予之用
饒以懷夷狄則震疊之威立以為祿廩則烝髦之士在
位以恭祭祀則祖考之神來格執萬國之帛清明而會
朝按六龍之馭彷徨而展義漢復逮于鰥寡周曠露乎
老壽戶興穆若之頌民無蕭然之費其豐年之報有如
此者宜乎勤恁方穀滋育毛澤備乃庶物美魚留之多
占于牧人協旗旄之吉四鬴羨食九土相宜生齒益繁
數溢司農之版墾田彌廣籍牘尚書之曹逢年之力在

茲草萊之歎咸弭下令無壅甚流水之源惟民孔懷思
天保之報畢曩聖之能事總列辟之通術雖甚盛德疇
以懿茲蓋仲尼以春加于王奉天之謂也算子謂王省
惟歲教民之謂也至若祈年孔夙方社不莫探精禋之
相盪香肸鬻之如答非奉天乎省耕以補不足省歛以
助不給俗毆躋于壽域人轉緣于南畝非教民乎古之
王者有一于此尚或奮藝乎絀簡垂美于金刻矧我后
循而致之篤而行之者哉言未終客乃避席而謝臣曰

未既也將授子四篇之頌焉客其卒業乃歎曰昔之聞
帝韶者肉味都忘語霸道者謏詒潛愈況夫鋪懿鑠之
丕烈訂豐懋之芬澤懋舊除害含甘吮滋若此而已哉
而今乃知上德之難名生民之受賜矣頌曰
一氣敷百華始澤無垠物咸遂

右一章春頌三言據本數

南風之薰化以融乘離司夏火方中朱明誕布福來同
庶生茂豫告成功

右一章夏頌七言據火數

西顥沆碭素律凝秋商含芬垂穎豐楙登嘉祥九圍清
淑秘祉播無疆豆登祗薦景福垂穰穰

右一章秋頌九言據金數

霜降兮百功成歲周兮庶績凝富萬民兮愷樂赫丕德
兮昭升

右一章冬頌六言據水數

景靈宮頌

宋史真宗大中祥符五年作景靈宮
仁宗天聖二年奉真宗御容此篇當是

邢登第

後所作

臣聞有開必先大樸為神龍之本率義而上九皇為聖
人之祖然則往來不窮之謂變陰陽不測之謂神其精
甚真強名曰道故其高出太虛深際六極冠三儀而稱
大亘上古而難老帝鴻得之升雲天伯陽得之為教父
遙源寶系接正統以延鴻錫羨貽謀啟靈心而孚佑非
天下之至蹟其孰能與于此乎真宗文明武定章聖元
孝皇帝之在宥天下也閱甫靜淵之樞繹思光明之懿

順攷古以遵妙道聿懷福以稷羣元雖有佳兵不矜其
忿驚雖有拱壁常寶乎慈儉詔爵磨砥石之鈍官惟其
人齋居錄賤星之囚刑幾于措絕金鑠次農書惠孤終
優老壽彌文郁矣監二代而可從大孝熙矣放四海而
皆準疵癘不作寵綏有截于是呼韓就序竝會清明之
朝戊己撤候咸羈荒忽之服蕭勺四暢粉澤交綯既而
藥晨真蔭接乎常明之寶蘭宇祕圖流于主文之辟援
絕瑞按秋游縱雉鬱蒼之椒奠繒堆堀之上曲禮之記

三百翕習而攄容神靈之封七千昭明而受記下之報
禮也既重則上之降康也彌速當其蒼水前戒紫宙博
臨瑜然象載之美飄如風馬之下嘉夜四馥順拜倅清
之容流霞載斟躬聞聲臭之載皇基遏悟飈遊上賓天
子乃稽靈心極能事以為誓誥所不及則稱事裁典故
我金聲玉振制儀號之當天人之相交必知意合德故
我鏤版藏鑄為積累之先盡物之多不足以稱德于是
總鴻鑠薦高廣之稱自外而至不止于無主于是度寶

構為密靖之都則景靈之作乃國家所以陳錫本支優
裕淳烈者也故其測星廟之秘緯即珍坤之寶勢磬鼓
不勝其樂靈臺勿亟于成宛延鴻紛上軼倒景靜深神
麗仰法太微峙大衆之會據神區之隩煥若飛樓之十
二接層城而在茲兀如神鼇之三番負五山而不去祕
殿博做繚垣盤亘珊瑚玉樹恍陟閭風之顛溝水蒲池
差勝渭陽之廟採詩供清夜之誦持節候神人之來惟
清靜之庭以觀其妙不攜貳之爽以為之宗蓋天子穆

然思所以蠲烝上神申固百祿者又可得而云矣先是上棟協吉也倚雲筑而流睿唱銀榜將署也泚壺墨而霏仙翰考室大備也治藻鳧晞蕭露漢錢差賜下逮乎門闌周醵凝觀徧露乎歌臺此樂成之三物也典領置使咨于台宰神靈標節著之休令六羽基德五雲御歷受民者十四姓長神者三百年則見于先天之紀雲日衆變天淵盈塞郡國所上者數百千所羣臣將順者千有餘篇則存乎降聖之記此昭荷之四物也禘所自出

王者之配益作原廟大孝之本于是竝詔方國建天慶
之祠生民厥初歆然著其盛有物混成寂兮為之母于
是嗣薦瓊冊推懿后之尊典鑄尚方摹琢黃冶作為上
帝之神寶分鎮列郡之殊庭此隆孝之三物也若夫赤
精下教陰隲乎九宗朱光以渥遂開乎百世事隔人理
故宮而不廟儀參僂品故薦而不血禮有因造事兼節
文則先聖御製贊載之備矣恭惟皇帝陛下奉承審訓
祇遜孫謀允執厥中純亦不已方穀既富樂鳧鷖之守

成祕過不移善春秋之順祀方且載主卒業見堇永懷
故即位之二年詔述先帝真像于是宮建寶殿以奉安
之其後再郊委粟之場大合清廟之主先甲而告按齋
輅以右回肆夏之趨飭釦金而一獻又以見聖者之作
明者之述周家之世世修德復命武王虞民之烝烝克
孝重協于帝者已原乎萬世不毀是之謂有功非人所
致是之謂受命五運迭起雜霸德者蓋斗精之餘千載
胥會守天聚者必感德之後我宋之興也基乎溟滓礎

乎遂始挾宇宙以制物載降為皇絕天地而屬民用佐
于帝及夫氣開于嗜欲之至兆應乎精神之嚮太祖經
武攻昧躬文王之一怒於變時雍太宗執競題期訓神
禹之五事莫匪爾極故真考之纂大也百度累盛羣公
交告仁閔之監臨我而無貳博厚之寶涌出而不愛有
積善為之長發有列真迪其凝命屹神壇謹馨絜度九
筵之堂枚枚而有血瞻八景之馭飄飄而下臻聯壓神
臯之奧區震顯舊邦之新命萬八千歲俾爾壽而無疆

十有五王靖我民而斯久與夫漢纂堯後立唐山之祀而文獻不足李出柱下尊瀨鄉之宇而獨恭不優非同年而語矣而臣濫首詞禁躬閱瑞圖猥奉方底之音謬當成功之告重念永定宸刻冠映三辰之章溫維祕文粹合五星之老矧敢軋稽緩之蒙思贊顯承之真躅剏皇墳之末揚天律之大哉姑述下武之欽崇粗標底績之和會至于奕奕寢貌奚狀萬楹之多縵縵帝容但繼百工之和躑躅流汗敢次頌云

於皇巨宋得天之統絕瑞雲照繁祺山擁福祿總兮粵
在三葉虛晨夢協青閭籠霄朱文委牒人神接兮帝心
祇遙沛容善述圓封累礪奠宗侔栗東風袂兮道蔭孔
彰飈游下翔歌繇悟陴執競日強命歷長兮真宗曰咨
咨爾羣辟揚庭薦號剝圭聯冊首宗祐兮真宗曰咨咨
爾疇工仰觀星定大度瑰宮罄爾邕兮炳丹激射飛仙
圖寫遽軒拖虹回阿舞馬表神舍兮擅屬周張瓊摩迪
嘗雲旒芬樹羅紫凝鏘奠青場兮天錫神寶飛榮妙道

美鏐冶質福庭分告尊有昊兮帝署嘉名宸藻樂成媯
天鏤石奎畫摹星襲六經兮兩宮纂服上儀繁縟不失
舊物聿懷多福似以續兮先聖丕律美假洋溢肖像頤
長棲神曲密降之吉兮干旄之旗惟皇厥都有龜而書
有龍而圖沓珍符兮五城宛延館御列仙淵然其泉健
然而天亘永年兮

皇帝幸玉津園省飲頌

有序 案仁宗本紀天聖三年五月癸巳幸御莊觀

川參此篇當是祁未之
從州推官任時所作

臣聞六氣時乘統以乾元之首一游為助表乎夏家之
謬王者法順動以省民教闢圓游而寓稼政車輿每動
則攸徂相慶僖我后之來蘓羽旄載揚則百姓欣告庶
吾王之無疾厥有其道非聖不舉恭惟皇帝陛下勤恁
道甫妥綏民極歛武旌而匪怒陳廟器以戒盈湯既執
中周先登岸際日出以丕冒罔不維序為天下而守財
予以克儉洪惟坤育之蔭叶贊天元之治繹思高拱滄
深淵以惟默凝覽泰定鑠清光而無際麟題信厚之族

章叙于內鷺羽羣飛之賢夷儀于外太倉陳粟之腐水
衡見錢之多又何以加既富矣簡則易從有親矣信可
以紓散否滯頤養精神詔警蹕出入之嚴慰臣民僥倖
之望雲霓大旱鐘鼓飾喜者歟若夫南直斗城外敵琨
苑勵儲胥長楊之禁均郊野近蜀之富先時斥官孺之
地以收課穀領勾盾之職因為弄田每丘麥既登原師
至喜則必按徐鑿之節省歛穰之勤因見三老力田差
賜百戶束帛供帳留飲極歡而罷勤民之恤累聖為常

月惟褻賓日次東井竊扈謹九農之政貽麴告萬箱之
收天子樂由庚之得宜間大昕之夙退前除隱樵之道
右清連禦之落官以辨物儲不改供于是廓霄宙賓暘
景洞應門引秘駕短簫銳吹沸渭而夾引師兵弩箛隱
轡而軍裝風清九九之塵雲彗央央之旆呼鞭凝響切
神光而全入鼓騎流赭統黃山而斜趣蓋天旋辰正以
降于行在焉觀夫周原砥平漢鍤雲荷甸師清野以獻
狀蛟夫滌場而作勞倬彼大田是觀銍艾饁乎南畝遂

成茨京採耒以識帝農之來棲糧而歌東戶之泰曩也
昏作今焉耜載既而美恩下屬偕雲而族颶氣相因助
風之薰散遺秉為寡婦之利豐四輔為上歲之食皇襟
允悅帝暉日潤乃詔環星之法從普合需天之宴慈惟
牙九張飲烽三燭外饗獻蘋嘗之膳太師侑日舉之奏
千唱萬和自成萬天之歌式晏以遨竝拜鹿鳴之賜懿
哉是舉可以推聖人之用心焉昔之重雍在辰多歡作
豫則必大縱芡苗之獵靡旃未還多從外夷之客過都

輒賜雪宮獨樂不與衆共鹿園增築虞其非正陛下駿
惠先辟慎脩思永方且蒞事之小塞政之違獨紆神行
樂登歲取因一夫之獲恤下之有勞推一穀之登勗民
之足食豈徒燕出入以為樂自滿假而居逸況時令之
既嘗新矣先薦寢廟春秋之不書他者惟重麥禾陛下
上以薦馨嘉下以勸耘耔一出而兼二美非聖人其能
哉若夫愛心自中不待弦匏之感至教廣運無須家戶
之至況臣廁技儒肆寓目車塵道之不談咎將焉執輒

次康衢之頌庶知上帝之力詞曰

君之來兮吾民休偃如雲兮驂玉虬君之樂兮我田良
積如坻兮豐太倉彼都之人兮宴以喜官扈民兮無落
事自今以始兮日益寧禹躬稼兮莫我京

乾元節頌

有表

臣某言臣聞至聖出乎千載由旦暮之逢升歌本乎百
工盛光華之唱惟乃神之宅后標載震之發祥庶物謝
生籲頌聲而樂止兩宮介福襲天算之萬斯褒贊所先

承平為盛恭惟皇帝陛下丕功建極明度塞違置方國
于阜安暢祖宗之純烈南北郊之祀竝薦于馨香一二
日之幾靡忘于兢業屬清和之戒候樂化育以延祺揭
著神靈題名節物荷鴻休之長發應禮享之多儀公圭
男璧以在庭金鑑珠囊而備物霞凝壽飲山立舞干呼
聲者三與嵩神而協應探策得一示天極之同符而臣
叨迹下僚欽聞絕瑞愛心所感雖近發于和柔峻德難
名詎周知于巍蕩輕投悴曲仰祝皇齡謹齋戒撰成乾

元節頌一首

於鑠巨宋茂德聳于四世聖文睿武仁明孝德皇帝聰
明寬裕清和溥鬯擁蘿圖付畀之重奉椒極供養之勤
玉色視大昕之朝乾綱統萬樞之政斗精布度氣母襲
常徹橫草之誰何措爰書之齋決茨梁露積樂華黍之
年豐芻蕘往畋謂文王之圃小于是後宮無珠玉之玩
尚方罷蜀漢之器遶東多士則自楚而刈萑寅亮柄臣
則增堂而及陞方且適寧先訓總覽大猷東面訪尚書

之文支日受漢家之奏黎民納我之軌物百神據我之
馨香宿離仰澄黃瑞湧出于時徒歌者迷上帝之力謝
生者懷天保之報矣粵若仲呂鳴琯炎官執衡軫躔中
昏月魄幾望元后誕聖之日也先時有司刺經取制援
天叩聖元以乾元冠于節首制曰惟霄系駿發之遠皇
階錫羨之厚重熙襲哲朕與嘉之況累聖之舊章也盛
典也其每歲百官効露囊之饋福庭嚴蒲饌之供內宮
灑九行之觴戚里上三服之貢臣隣和會黔細禔福若

此而已矣臣祁昧死再拜而言曰夫天宰默定生民而樹之君帝期感會出震而齊乎巽且圖緯存必著之感故神靈無虛發之應昔者電樞北統軒祖得之以款塞門接萬靈渚虹下流少昊得之以官鳴鳥卓五典河龍出游丹陵感之法天以為大禘乙臨降景毫受之奮那而為首生民厥初詩人推之以尊后稷之載育在震不憂太史謹之以驗文王之夙成或赤光照室卯金復四七之祚或紫氣充庭仙李兆本支之蔭此可畧而道者

纔數十君受命之難不其然乎至唐開元有臣曰說始
建千秋之號名為白帝之謬爾時自謂說休烈評景炎
作古于我無慙來葉然未有殊尤絕迹震寤黎獻可攷
于今者也伏惟陛下體兼二儀精合五老當履武之始
也至和薰于太史之琯及誕彌之期也清瀾冽乎馮夷
之宮祥雲入房神龍視浴故生而岐嶷握袞著其文長
而敦敏甚德包其度宥密而不敢康功業以見乎變及
夫宅端命繩遐武日出而天下明風興而羣陰伏成王

訪落以謀廟文帝銷志而求衣皇矣上帝之監一哉王
心之協九歌叙四維張然後顯顯卬卬如圭如璋以奮
乎天子之光議者述夫南訛之交君嚮以治也盛德在
火式秉其王也炎精挺其命則真人應其期覆視圖謀
之兆宛如符節之合天之啟宋不惟舊哉是日也候華
瞰闕層禁積陽之鷄三唱雲龍之幄九張樂羽芬庭虎
戟夾陞謁者治禮以次奉引噦鑾皇紱拱乎有定之著
襲玉卓馬陳乎旅百之賓夷苗裘長竭歡致福者膜拜

以俟羽裳毳侶續壽無量者列奏以聞肅然若百靈會
帝于鈞天翹然如十月朝漢之長樂俄而呼鞭傳警雕
輦出房神扶太庭之居天臨絳宸之坐上下臚句內外
傳趨望堯之心若雲慕舜之德如蠲視不登袷天咫尺
顏一以贊下武之丕承一以樂天命之陳錫薰風可馭
薄翠蓋而裴回香雲攢柯衛赤旂而容與既而人聲之
歌作堂下之樂奏惟一二元老上千萬歲壽誕育之慶
推于母儀壽昌之算還于天極使聖人富而多子三祝

可兼食天子日舉以樂太平為盛然後合需雲以賜法
酒晞湛露而宴諸侯幣帛以將之慈惠以示之神鼇傾
首之抃王魚萃尾之躍與下同樂克洽萬邦之歡卒事
不規蓋陋六王之享煌煌哉嘉祚之鉅麗橐飫之飾喜
非我后其嚮離之夫日月不紀其初則無以重寶精之
序頌嘆不布于下則無以示王澤之深下臣區區敢忘
斯義其詞曰

昊天之命於穆不已挺生我皇赤帝之精感乎孟夏昭

迪殊祥惟乾之健配元之始嘉節允臧上公拜首稱千
萬壽淳醴是將帝謂三事股肱同體舉君之觴百執和
會揚休樂凱奉承親光天乎悠久地乎博厚我君無疆



景文集卷三十四

欽定四庫全書

集部

景文集卷三十五

七

詳校官侍講臣王燕緒

檢討臣何思鈞覆勘

總校官候補中允臣王燕緒

校對官學錄臣謝登雋

謄錄監生臣汪國均

欽定四庫全書

景文集卷三十五

宋 宋祁 撰

頌

太一新宮頌

并序 案仁宗本紀天聖六年九月祠西太一宮宋會要雍熙元年建東

太一宮天聖六年建西太一宮此篇當是祁已改太理丞國子直講時所作

臣聞昔者宅命之駿索百神以徧祭降生之嘉鼓萬物而均福然則祀典載其羣族禮文頌其盛節疏之則氣

縱而靡震狎之則精搗而不物上聖于是揖歸運之孚
佑倚太虛而參變慎齋精意洞洞屬屬旁求于幽闇焚
蕭煮鬯芬芬苾苾進于馨香是以封君錯居守神靈
者七千之廣冢宰制用備祭祀者什一之仿誠欲異而
不瀆建為有極鼓舞至妙祛合無垠以億上帝以庇生
民者也粵若體粹亨之元奮希微之妙厥存主宰以司
變化上驗祕緯之次總按萬靈之圖何言而善乎應象
先而不為老聃稱太一尊有十神毫忌啟奉祀之方天

官著常居之記化截羣有輔蓋高之監文包幽室啓無
窮之命疇恤祀而不昌罔置神而能永若乃瑰宮奕奕
礪砥而孔曼嘉壇崇崇藉屬而四合藥笈真籍按循醺
式草樓上士奉承薰濯沃酒茅以示潔默牲饗而撒腥
蒐三代之文有所未秩擘羣條之極制定其當質不及
野儀不過物鎮神華以作固舉裨海而蒙祉非巨宋之
善制疇克臻于此耶恭惟皇帝陛下高拱密清共規洪
鬯得天統以播憲括地象而經野建大中之治陳之浹

日訂丕承之烈肆于時夏尺一信牘重撫樹惇之鄉六
齊佳兵更鑄大農之器回霜收電而欽刑之恤鉞疽委
轡而慎赦之數合質劑以一度同土炭以均風捫箕舌
而聖佞讒攬倖措而黜纖巧于是都人擯蹠嚙于贅聚
女紅後纂組于絀織薪棧美官人之盛鰭魚譬萬物之
多光明緝熙上下充格儒者之喙三尺納于抒頌從臣
之橐千翰禿于宣美方復澹然無治幾而不康可以震
珍見怪者罔不祈可以蒙嘉獲豐者罔不序由是種祠

舊時悉領縣官嘉幣偶馬以為歲事者不可載已乃詔
建太一宮于都城之西南順禮文介熙事且言時也先
是筮龜既同天星既中主以僚景臬以攻位鎮沈與之
厚載據神明之積高審曲有經仵圖中覆陛下以為崇
奉真陰導迎祕社不可曲外府之財用取祝史之辭忱
乃命損乘輿張飭發少府藏償其調度因過更冗卒覆
將作善匠給其買程既而隴材千章周版百堵督墨為
雨叩馨成雷法大壯之上棟憲斯干之南戶人不扶勉

工以雄成未踰二時大告考室述夫祕殿則崔嵬博敞
鬱律鴻紛翠蚪齊首以負棟海鷗靈尾而銜瓦玉礪重
荷文璫四注陽宗倒光以納景陰祇濛霧而扶傾犀塵
不游螟風無隧乃有皇邸五色黼帷九張為之真寢乃
有雲梢三素綠輿八景儲乎仙衛甲乙異張辛壬殊秩
衆殿竝列十座如一煥紫宮之是環玕赤霄而可挹其
左右則飛宇回帶修廊班屬雲縈百層芝栢萬狀因其
真畫之品竝繪羣靈之跡恍然覺神仙之可以致肅然

知鬼神之易為巧具前則藻扃連觀抗為重門樹松隱
椎表其馳道揭示篆銀之榜列坐鑄鐐之狄所以震疊
焜照千祀也其外則繚垣白威靈囿封殖甘露騰文于
茂樹醴泉側出于陰溝間以九層之臺五城之樓榮曜
倥傯袂挹浮丘所以範圍鴻洞九清也及夫嘗烝戒旦
剛柔涓辰被惟淨之場衷列真之對于是乎水土和氣
之寶玉帛二精之虔吐毛紛旅洞潦淳漑仙漿揖斗香
雲薄霄像以鸞輅龍駒罷以鈿金華蓋瑞祝發中而臨

遣使者持節以待祠靈琰絳幡導乎謁款則盥而不薦
稽大易之象坐工合樂陪乎夜誦則昏祠至明采甘泉
之制高真竝享啐福如儀飛龍秋游以格思肝饗興作
而歸福數百千所聊記符瑞之多七十五來更邁神光
之異猗歟盛哉濬哲之能事神明之鉅典也蓋制作之
本我朝舊矣始太宗徇史官之請胥宇于國南以開拜
謁之館今陛下按故府之法度筵于都右以敞集靈之
庭俯仰其前不失夏家之舊物陟降于上越成周邦之

新命有由然也夫神能專福不加于鮮德君能專祀不殖于非禮且如黜其封血豈為穀腴之愛而懿德改薦遂介無疆之休探乎祕經不徇拘攣之義而層構昭事自成一王之典捐金斥幣紓執事之滯而民不益賦升壇奠筭為百姓之請而過無移下由是言之寧不善始善述雖絲衣其紉高子誌星尸之繹夢蛇下屬文公作廊時之瑞待我具五始標黑帝之祠嚮坐而拜躬接高門之享一何區區者已下臣陶乃文之化覲告成之蹟

固非大夫之能賦實虞新者之多誚輒次興頌升之有
司其詞曰

負焉層構兮鎮我都之夾右兮我稽神宗之舊兮

右一章

肅然上靈兮戾我宮之靖冥兮我據昭德之馨兮

右二章

帝省黜黎兮匪孔禱之私兮與神衷是對兮俾物之阜
而滋兮

右三章

天眷聖皇兮執周道之彊兮俾君壽而臧兮配天之久
且長兮

右四章

藉田頌

案此篇是仁宗明道二年祁直史館時所作

皇帝再紀元之明年春二月率羣臣耕于東郊恤災祀
祈豐年也前此詔書示有司曰自我太宗襲熙厥功億
神裕人省命方國肖翹跂行亦莫不寧永惟土著之本

民天之重乃躬耜田以倡農先震地房之滿肯導改政
之長懋柔嘉令芳于是乎孚盱蠶鹵莽滅裂于是乎復
敦龐穗滯秉遺見糧如坻我真考因其累盛重以明德
故能步師百萬狩醫閭見武節高世八九升突遼建元
封奉符隕祉以攄無極肆余承緒祇率厥典則藝蕭布
幣固有常所監農狎野厥存舊章惟一二執事率循而
懋明之方春作時百穀萃始姑使斯人悅羽旄之美重
見漢官後嗣諗稼穡之艱不失夏物無贅聚儲峙無煩

勞供帳趨合于禮劬吾農焉前期則修飭神蠶按除膏
壤夷道如砥呼蹕填街稍獲猶以護野雜荆牟以守燎
阡陌繡錯原隰龍鱗蒸膏冒楫協風回春于是旄頭先
馳屬車齊躅奔星舞于旗旂行月棲于羽旄壽犀注鎧
肅給乎師營蒼虬範馭秋游乎天轡瓊釵流景金根照
塗帝幕周張紈綃綵繅既而揉耒剡耜載保介之間先
種後稷麗播植之器官分無諉事具不教天子乃以丙
午之旦升華輅由大庭顏行山則銜枚無聲龍虎見象

堪輿奔警至閭闔切園游乃徜徉乎層城之外五精來
同七聖景從鑒聲佩節次于惟宮上既淳濯圭潔儲思
淵默昧明乃頓大次款嘉壇索先農以享之因教稷以
配之血毛幽金石鏗勺躬接妥侑加祠官之一等禮
重沿襲具祖宗之遺意爾乃降靈場儼朱紘物覩于聖
天健其行星田彌望紺轅儲駕洪縻序進玉步有容三
推成禮邇臣告備上曰朕志在敦本充其強力既可以
勸何憚于勤遂推而進之有司以義固爭幾十壝而後

釋乃始弭節容與御夫觀耕之臺三公羣后班趨次耨
靡然從風邁五踰九大農灑種庶人終畝官師拱手行
內天旋于時都人熙熙駐望皇軒或歌以壤或擊于轅
不圖叢雲之旦復見東戶之年日華晏溫天心憑豫奉
斗極御應門翔鷄樹竿墜鵠宣制大賚四海與之更始
虧除威辟存問高年振淹修隆平徭闕賦中外百執告
至而策勲踐過三更以差而賜帛膏以解雨鼓之異風
不崇朝而周萬國先是羣臣繹丕懿潤鴻名將琢之玉

版納于金匱至是則回雕輿坐前殿震照儀矩翕受典冊皇哉茲禮真帝世之希濶臣工之旦暮者歟儒臣學于舊史竊明載芟之詩甸師之職在藉之義有三說焉一典籍之常禮二籍履以親事三借民而治之所言雖殊要之驅天下之民棄耒而歸本耳且古者謹察天廟申赦陽官田之不闢辟在司寇作為御廩鍾而藏之其故何哉以為奉薦粢盛非無良農不如親之愈也課督耘耔非無猛制不若勸之善也夫祭莫大于備物物備

而百神據之兵莫大于足食食足而四夷懷之人莫急于豐財財豐而有生聚之是三物之濟否在此舉也且周宣缺之戎軋其衰漢文用焉民阜其宜唐后勤止以豐易饑洪惟太宗光廸于前陛下述宣于後皇矣同底于道蒸哉不隕其聲方且九扈勤民三事就緒儼儼其威陳陳相因糧餘可棲草殖弗與民一于耜家萬斯箱遂駕五帝軼三王奮甘寶而據馨香也敢作頌曰

倬彼鮮原帝藉于田匪藉其勤我為民先悠悠春旗覲

土于畿陽膏澤澤邁乎三推有士有林亦莫不祇我疆
我理載耘載耜實苞實阜第厥豐草田畯至喜祈年伊
早我穀用成我倉既盈我倉耽耽鍾于東南其用伊何
事神薦馨為酒為醴為粢為盛蒸之浮浮釋之漶漶上
帝居歆降福孔休降福伊何我民既蕃室家溱溱三事
不謬食足武奮震疊爾功蠻夷來同罔不率從帝猷昭
升式于九圍競競業業以迄萬幾在豐念匱在飫思飢
子子孫孫勿替引之

陽郊慶成頌

宋仁宗本紀景祐二年十一月乙未
祀天地于圓丘祁時為太常博士此

篇即其
時所作

臣某言臣嚮者幸得以博士奉侍大祠清廟圓丘恭導
升降伏見陛下接神措事飭躬備物疊疊夙夜如不敢
康至誠上通靈貺如答輦出殿幄而瑞霏先塗齋款宗
祏而祥飈迎輅景至之夕步自帷宮改衣雲散燈壇月
皎收戢淒凜煦如陽春旂無蕩游燎無搖景已事還軫
官不告勤三靈洪洞交相為慶滌穢蕩瑕納于昭清此

則上帝所以顧諟陛下所以欽奉天人之際不為遠已
臣親覲盛禮昧于知量輒訂詩人之義作陽郊慶成頌
六篇義大詞褊無以游揚萬一庶幾俟童謡漢擊轅慕
韶之比竊用繕錄冒昧以聞

瑰宮朝景靈也 屹瑰宮帝下都君來饗六龍徐羽籥
羅金石揚儼然進薦嘉觴靈之歆肅陰陰徧觀此懽羣
心既安坐塗青黃紛上馳爛遺光賚孫謀永延長

右四章三章章四句一章六句

我將裸饗太廟也 我將受命于祖于宗洞洞翼翼物
有其容物容備矣帝心嘉矣有壬有林駿奔走承事夜
如何其我不敢寧萬舞洋洋九奏備成燎薰以裸復降
在庭毛魚竝進亦有和羹帝酌而獻工祝善詞儼然如
聞孝有餘思神飲我福并胙而餘辟公亞薦就幄以須
禮成七祐不教不疎徂來于孝嗣福祿總總絜以溢
我受而施之駿惠丕承寶我大龜

右八章章四句

枚枚祀奉慈也

崇仁宗本祀崇祐二年詔奉慈廟遵莊
獻莊懿嗣子莊穆之次故此云祀奉慈

也

枚枚閔寢三妣厥靈以肖柔德

崇原本
缺三句

但篇不干有

罄無錫盥而又薦我孝我虔物以志誠不在牲牷貳簋

嘉止百福番止無不或承以保我天子

右四章章四句

嘉壇合祭天地侑以祖宗也 熙嘉壇兮泰尊醵並饗

兮坤元祖與宗兮侑純嘏百神服兮壇之下千枝列炬

紛秀華微風蕩漾月金波樂遵奮物金石和帝造新曲

揚清歌鬱華聯素醪品醇馨聞既達封血陳泰豆甘寶
炳蕭春壁精粲粲琮黃煥三坡升降玉鉤鳴裴回常羊
延上靈至誠感通對殊休諄勤此路符所求燎籠盤空
幣煙舉天極餘歡篤紕紕紛紆六幕雲施普

右五章四章章四句一章三句

南闕肆大肯也 南闕爵連天翠華此臨馭靈心交肝
蜚鴻恩思慶豫迢迢上鷄竿籠童下置鼓翠綏儼康至
赭按軒霞舉比屋後予后婆娑聲載路滌穢天瀉波崇朝

解為雨束帛勞衆士三錢發中庫下蒙不貲惠上錫無
疆祚俾壽萬斯年南山均鞏固

右一章十八句

垂鴻受徽冊也 惟帝垂鴻法上天推名讓德紀初年
溫瑜祕篆金騰聯涓成吉日膺鴻冊申羽刻商諧樂石
冠劍相趨紛動色帝徇羣心答天意珠旒粉袞拜容備
不休顯號光神器功躋皇王黜雜霸不自矜功無滿假
翼翼虔虔對天下

右四章章三句

明堂頌

案頌作于皇祐二年本紀所載祀明堂月日俱于此合時祁復為翰林學士太常乃

其兼官

臣某言三月戊子制詔季秋有事于明堂臣以太常與禮官博士詣垂拱殿啟配饗事即建言周有臣曰旦始嚴父配天仲尼是之唐并諸儒說竝祀六天帝不敢損陛下幸訪有司請如古便四月乙丑詔若曰夫禮稱情適文今議者言周唐則善至牽制所聞褊而不優宋亦

一家讓不制作如來嗣何且事天不及地配父而遺祖
朕甚陋之水旱不時羣神預焉今賴天之力方內以治
朕能合饗天地以三聖侑服報百神咸秩竝修況祖宗
郊雩不為無比有司無諱以勞務稱朕意臣伏誦聖訓
久乃開曉以為前古所缺羣臣不逮陛下獨得于心其
所以事神訓人使萬世子孫無以加者至于作聲歌琢
圭卽帳幣無文夜蠶弗嚴以竭恭致敬者尚數十物臣
愚且不能徧知若今詩頌不傳是陛下盛德神功不盡

注天下耳目聳動四夷聲隱乎無疆也謹撰成明堂頌
一篇辭淺義直可使戶曉壤翁轅童皆得歌詠臣昧死
再拜以聞頌曰

天有明命以聖付聖太祖太宗變代大定誰僭而王孰
擅而土左披右攘罔不就緒厥角在廷四夷無侮真考
顯承受報收成休休厥寧震震厥聲七十而五號以大
榮皇帝纂武有庇于下兵燹不銛筋委而羽一農之饑
吾飼以哺一夫之寒吾暖以褚日寬租徭歲貸囚瘐協

氣四薄順陽若雨原高隰下百穀膻膻二十九載惟秋
九月廼即大慶度筵度室寶字署顏震照多物置使有
五悉詔輔弼既款靈宮亦享廟祏天兵桓桓羅列衛營
有闢有游龍輓螭衡耳耳其驅雅雅于行旖旎連蜷風
舞雲縈士若銜枚駉牡不鳴吉日辛亥進祀于堂衣畫
袞然環瑤瑤瑤六帝二祇三后侑旁醴淳牲肥嘉罇鉅
房芼醢果菜淨潔芬香膋熾胖升以迎厥嘗我鍾欽欽
我舞俟俟天妥于坐百靈來序奔精哆光留霍層宇山

靈濟怪顯幽馳驚或旅諸墀或席諸廡

案此處疑脫一句但文鑒亦同

別無可攷故仍之

有羶斯飫相維辟公既敏而度帝拜稽首柴

煙上舉祝有嘏言皇帝受之產百斯祥裒萬斯禧其轟
如山其積如茨皇帝曰咨朕不專有且御端門百執奔
走其赦天下新邦之舊賙之錄勞剗濯痕垢官賞兵賚
金爵是富驛歡四海間弗吝晝天謂皇帝感實火德火
德在孝宗祀惟極其還而功卹嗣千億而子而孫長有
萬國天謂皇帝安我羣元投蜚斥螟稼溢于廛厲訖疾

攘人樂蹁蹁皇帝眉壽永錫萬年前祀三日區霜如閉
皇帝既齋一夕而霽六幘掃除若瑤筵天清地晏夜
星騰晰皇帝小心恭與度并徧見神祇拜跪送迎久立
于次須樂之成器必金玉牢不愛牲制為諸安以正和
清夜鼓徹嚴敷致厥誠明明皇帝惟先訓是式惇睦懿
親其磐如石存問韶耄容受譙直振淹登峻母或失職
惟慈惟仁不厲聲以色皇帝有言克己則興豐守吾儉
尊捨吾矜惟日之升瞿瞿競競無不此或承

尉氏縣呂明府創修洩水渠頌

神州之地積高于西北而庠下于東南尉氏直其坤隅
故上薄周疆側負鄭鄙汙瀆所蕩行潦所趨注我西偏
匯為大浸異時縣官往往募民開田渠入之惠民河

今自

江以北溝漕
總目為河

因灌淮楚人雖在勤水不為害太平興國

初或建言惠民河瀕尉氏折東而北地泐墊漏水多壞
決迺西並崇岡更開新道長隄右移衆渠咸塞于是水
無所洩則沮洳淵淪鍾為回淵每水潦不時必壞官亭

漂室廬害膏腴之田千百八頃其大者則韓溝護軍二
陂以名自達輪廣三十里他脈連股引延緣葦間溝遂
之小小者尚數十百所匪民厥壤邑吏選吏不敢聞
歲趣其租人用重困蓋水留四十年狎為常玩事窮而
復理固然也聖上初元之年大理丞呂君長吉始為政
于茲邑既視事即按行堤閼周知其要乃嘆曰河漕中
都堤不得弛陂盤善地水不容止潰陂注河則舟廢繕
河限陂則農奪長吏不謀土其魚乎于是度楊橋之北

累石編木以為竇口規引積水潛出河下東因廢洫行
七十里與惠民下復合水有所放漕亦無停君即仵圖
上言于計便甚事下丞相府復詔中貴人段微明與寰
內察按使者李識張君平等興作水工覈實程員無慮
用材五百章礧斲數萬膏聖稱是工四千人度三十日
罷條陳中覆悉蒙可報明年正月遣內侍臣譚好古領
徒護作君參掌焉衆以子來匠以心競任器成雲環材
若林不急不徐如期而畢以佚道使人故也二月渠成

水下澆潯轉騰曼羨紆餘灑其沈災導其流惡數旬而
牛馬辨經時而桑田復是歲耒耨所刺排水澤而居者
蓋以大半三年水涸地沃畝率收一鍾流庸還占參倍
于舊過是而獲者則不書矣于時和氣綢繆閩邦如春
繞為景風結為油雲終古沈疇一朝茂殖昔之勞人今
焉樂國夫善防者水厥之善溝者水漱之因地則氣不
壅達變故民不倦惟呂君畢給政術舉無後艱肆水之
走下而奠其歸乘人之曹好而興其利縣令之任今所

輕已君而重之敝政之改重所難已君而易之探古舊
章圖我新政復地力阜財用民饑不愆神精可懷禦菑
鍵蠹莫非嘉績朝旌厥能秩君宮坊大夫佐郡二千石
民去思者八歲矣穀益以殖年益以豐億萬之口并蒙
厥福既而邑之耆耄雜然共計曰呂君功緒章章在人
其可歌也盍琢金石以鋪其馨香予從事于斯文宜倫
次興誦而存其梗概頌曰

天畿之南兮下田良墜派弗洩兮漂我疆地環萬井兮

原其谷歲踰三紀兮祖弗屬我有賢君兮來何遲累礪
疏竇兮河之麋注潢引汙兮渙東湊鮮原畎畎兮農其
耦水反歲定兮黍稷華稠載斯箱兮紛滿家去我茲久
兮田益廡手之足之兮聲在路何以報君福穰穰明神
所勞邦之光樹樂石兮渠之旁攄德音兮永不忘

景文集卷三十五